

مرآت حقیقت

تاریخ محمود جلال الدین پاشا

قطعہ

مؤرخ مستقیم اوراق کرکدر نقل و عقلمندہ او صورت ضبط تاریخ ایتمک اس اساسیدر
اولور هروجهاله عکس حوادث منجلی زیرا بو « مرآت حقیقت » جامع سر سیاسیدر
محمود جلال الدین

جلد اول

طابع و ناشری

مطبعة عثمانیه

طابع و ناشرینک هر بر حقوق نظامنامه مخصوص احکامنه توفیقاً محفوظدر

— (۱۱) —

در سعادت

۱۳۲۶

فہرست جلد اول

صفحہ

مدخل — مقدمہ	۴
دولت علیہ ایلہ روسیہ دولتی بینندہ جریان ایدن یوزاللی سنہک وقواتک اجمالی	۷
جلوس عبدالمجید خانیدن پارس معاہدہ سنہ قدر اولان وقایع	۱۵
پارس معاہدہ سندن جلوس عبدالعزیز خانہ بہ قدر جریان ایدن وقایع	۲۰
جلوس عبدالعزیز خانیدن ہرسک مسئلہ سنہ قدر اولان وقایع	۲۴
جزؤ اول — ہرسک مسئلہ سنک صورت ظہوری	۴۳
تبدل وکلا — بعض وقایع سیاسیہ	۵۳
بلغارستاندہ انار عصیانک ظہوری — صربلورک تھیانی	۵۹
امور مالیہ اوزرینہ اولان تشبثات	۶۳
قونت اندرائشی لایحہ سی — عدالت فرمانی	۶۸
ہرسک عصاتہ قرہ طاغیلرک التحاقی	۷۵
بلغارستان اختلالی	۸۰
جزؤ ثانی — استانبول ہیجانی — سلانیک وقعہ سی	۸۷
برلین موراندومی	۸۹
طلبہ علومک حرکتی	۹۱
تبدل صدارت و مشیخت	۶۳
ہیئت جدیدہ وکلانک بعض اجرا آئی	۹۷
وقعہ خلع عبدالعزیز خان — جلوس مراد خان خامس	۱۰۰
سلطان عبدالعزیزک وفاتی — بعض وقایع مهمہ	۱۱۶
سلطان مرادک تیجینی — چرکس حسن وقعہ سی	۱۲۷
بلغارستان مسئلہ سی	۱۳۱
ہرسک اختلالنک وقوعات اخیرہ سی	۱۳۸
صربستان مسئلہ سی	۱۳۹
قرہ طاغ محاربہ سی	۱۵۴

فہرست جلد اول

	صفحہ
جزو ثالث — سلطان مراد خامسک انحلاعی -- جلوس عبدالحمید خان ثانی	۱۶۷
بلغارستان اختلاٹنک ماہدی	۱۷۵
صرب محاربہ سنک قسم اخیرى — بعض وقایع داخلہ	۱۸۳
قرہ طاغ محاربہ سنک قسم اخیرى	۲۰۵
قرہ طاغ و صرب محارباتی متارکہ سی — استانبول قونفرانسى	۲۱۰
قانون اساسى عثمانینک تنظیم و اعلانی	۲۲۰
قونفرانس مقررآتى — صورت ردی	۲۲۵
جزو رابع — احوال عسکرىہ	۲۵۰
احوال ملکىہ و مالیہ	۲۵۵
احوال سیاسىہ	۲۵۷
صرب و قرہ طاغ حکومتلرینک مصالحہ یہ دعوتى	۲۶۳
تبدل وکلا — مجلس مبعوثان عثمانینک کشادى	۲۶۶
صربستان مصالحہ سی	۲۷۴
قرہ طاغ مصالحہ سی حقندہ کی تشبثک نتیجہ سی	۲۷۷
لوندرہ پروتوقولى — صورت ردی	۲۹۲



تاریخ

وجیهة تحمیدات و تسلیاتی ایفادن صکره خامه مؤرخ حقیر شو وجهله رقم زد تقریر
 اولورکه بیک ایکی یوزطقسان ایکی سنه هجریه سنده اجتماع اسباب شر و شور ایله سرزده
 ساحه ظهور اولان بوسنه و هرسک اختلالی بلغارستان و صربستان و قره طاغ عصیانلرینک
 وقوعه و آنلرک نشایجی دخی بیک ایکی یوزطقسان درت تاریخده روسیه دولتی ایله دولت
 علیه بیننده باب مخاصمه و محاربه نك آچلمسنه بادی و او محاربه نك نتیجه سنده عثمانلی
 اردولرینک مغلوبیتلریله روسیه لولرک استانبول قرینه قدر فرجه یاب خسار اوله رق
 «ایاستفانوس» قرار کهنده دلخواه لری وجهله بر مصالحه عقدینه دولت علیه یی مجبور
 ایتمه لرینه مؤدی اولوب کرك انك و کرك متعاقباً برلین شهرنده بین الدول عقد اولسان
 قونقرده ایاستفانوس مصالحه منک تأییدیه برابر تنظیم اولان معاهده عمومیه نك احکامی
 ایسه دولت علیه یی مادی و معنوی ضایعات عظیمه یه اوغراشمس ایدی . چونکه هر ملتده
 فن تاریخه منتسب ارباب قلمجه بولندقلری عصر و زمانک وقایع و حوادث عبرت افزاسنی
 ضبط و تحریر ایله اخلافه یادگار براقق قدر بختیارلق متصور اولمیوب بویه بر خدمت
 فاخره یه موفقیت ایسه ضبط و قایمجه دائره و قوف و اطلاعت و سمعته هر وقعه نك منشاء
 و اسبابجه ظواهر دن زیاده لدنیات و ماهیات حقیقیه یه متعلق معلوماک تمامیتنه موقوف
 اولدیغندن ماعدا قلمه آله جق و قوعانک دقایق مهمه سنی محاکمه ایدوبده ارباب مطالعه یه
 کشف حقیقت و احراز دستمایه عبرت ایچون تسهیلات کامله اظهاری دخی مؤرخه بر
 وظیفه مشکله تحمیل ایلرکه انك بحق اثرینی میدانه کتورمک بالذات وقایعک ایچنده
 بولنه رق معاملاتتی اداره ایش اوغنه و ایچنده بولندینی واقعاتی بالفعل عالمی محیط و شامل
 اولان رواة موثوقه و معتبره دن اطرافیه تحقیق ایش بولنغه محتاجدر .
 مؤرخ حقیرک باب عالیده دور مناصب و مراتبله دفعه ثانیه آمدی دیوان هایون مقامنه
 ماموریم هرسک اختلالنک ظهورینه مصادف اولوب یکدیگرینی ولی و تعقیب ایدن مسائل
 آفقه الیایانک دقایق ملکیه و سیاسیه سنه دائر اوراق و محررات و مجالس و کلای دولتده جریان
 ایلیان مذاکرات هپ قلمندن کچمش و بوضره ده ایکی دفعه واقع اولان تبدل صدارت

هنكامه لژينه متعلق سرائر و خفايا به اطلاع تام حصوله كلوب بالذات معلوم اوليان مواده
 دخی ارباب و ثوق و وقوفك مقام حسب حالده نقول بيطرفانه لری صحیفه ایقان و اذعانہ درج
 و علاوه قلمش ایدی که بو قدر معلومات یقینیه و استطلاعات حقیقیه یی موقع مأموریتی
 مساعد اولیانلرجه جمع و تلفیق ایتک بانه مشکل و مستحیل اولدیغندن انلری مکتوم
 و منسی بر اقوبده بزدن صکره بو کارگاه فسادہ کله جک ملتئمز افرادینی اوغرا دیغمز مکدرات
 وقایع تأثر اتندن حسمه دار اعتبار ایتماکی روا کوره مدیکم جهتله اشتغالات امور رسمیه بن
 اختلاس وقت ایتدکجه ضبط و تحریر ایلدیکم وقوعات و حادثاتی بر تاریخ سیاسی اصولنده
 ترتیب و اوچ جلدہ تقسیم ایدرک میدانہ کتورمکه موفق اولدم .

خالقه و طبعاً ملتئم اولان طریق راست کوی به فکرأ و قلماً نه درجه ده سالک
 اولدیغم ارباب دقتک عکس انداز آینه ادراک و اطلاع لری اوله جغیچون بو اثر « مرآت
 حقیقت » اسمیله توسیم قلندی .

مطالعه ایدن اهل وجدانک حسیات لطفیه لرندن امید وارم که خدمت حقیر لسان
 شاباش تقدیر ایله یاد و تذکیر اولنور و حفا یای کلک قصیر دامن عفو ایله ستیر اولور .



مرآت حقیقت

جلد اول

بوسنہ و ہرسک مسئلہ سنک ظہورندن روسیہ محاربہ سنہ قدر ایکی سنہ لک
وقایعی حاویدر

برنجی فصل

دولت علیہ ایلہ روسیہ دولتی بینندہ جریان ایدن یوز الہی سنہ لک
وقوعات حربیہ نک فذلک کسی

دولت علیہ نک دور فتوحاتندہ روسیہ دولتی شمالی برکوچک حکومت اولوب اوروپاچہ
موقع سیاسی بہ مالک اولدینی کبی عثمانلورک سطوتنہ قارشو کلہ جک اقتداری دخی حائر
دکل ایدی .

حتی دولت علیہ نک نیر شوکتی قافقاسیہ وقریم قطعہ لرنده کی قوای اسلامیہ مفارقندہ
شعشعہ افزا اولدینی حالده روسیہ لولر اورالرده بولنان آل جنکیز حکومتلرنک خراجکداری
ایدیلر لکن عصر وزمانک آثار انقلاباتندن اولمق اوزرہ «قزان وازدرهان» خانقلرینک
اغشاش و تفرقه لرنندن استفادہ ایلہ انلری بالکلیہ مندرس و مضمحل ایدرک دشت قیچاقدن
ایرلمش برقطعہ وسیعہ بہ مالک اولدیلر و بوجہ تله قافقاسیہ بہ طوغری تعرض ایدہ بیلمک یول
بولدیلر ایسده قوت و مکتتاری حرکت تجاوزیہ اجراسنہ مساعد اولمامغله هجرتک بیک
یوز تاریخنہ قدر برشی یاغغہ مقتدر اولہ مدیلر .

مؤخرآ مشهور بیوک پترو ظهور ایدوب اوروپا دولترینہ تقلیداً روسیہ دولتنک
اصول و نظاماتی تأسیس و معلم عسکر ترتیب ایلہ شمالاً بحر بالطق و جنوباً بحر سیاه
طوغری اقتحامہ حصر افکار ایتدیکنندن لهستان و اسوچ ممالکینہ تعرض و قبار طای
وداغستان طرفلرینده تسلط ایش و اول باول ازاق دکزنده دونما تدارکیچون براللق
دولت علیہ نک اوستریا ایلہ محارب اولسنی فرصت اتخاذ ایلہ اعلان حرب ایدرک ازاق

قلعه سنی و قوبان جهته طوغری خیلی اراضی بی بیك یوز اون ایکی معاهده سی موجبجه ضبط ایلمشدر اما بیك یوز یکر می اوچ تاریخنده وقوعبولان بالطه جی محمد پاشا معرکه سنده بترو گرفتار اولدینی مضیق انهمزادن تخلیص کریبان ایچون مغلوبانه امضایه مجبور اولدینی پروت عهد نامه سی ایله ازاق قلعه سنی و طیغانده یابدینی قلعه بی دولت علیه رد و تسلیم ایتمکله برابر هیچ بر حکمدارک هضم ایده میه جکی تعهداتی دخی اختیار ایلمش ایسه ده کندوسی بر فکر جهانگیرانه ایله ظهور ایدرک روسیه دولتک بتون دنیایه غلبه سی و علی الخصوص دولت علیه نک احساسیه استانبولک ضبطی سوداسنده بولمغله او یولده قوردینی دولاب استیلانک اداره سنی اخلافه سپارشله ترک دغدغه جهان ایتش ایدی ایشته ایوم السنه انامده شرق مسئله سی نامیله یاد اولنان و اوروپا موازنه سیاسی سنی زمان زمان اخلاصه سبب اولان مسئله بیوک پترونک آچدینی مسلکده دوام ایله دولت علیه اسلامی نک بنیان شوکتی هدم و افنا ایدوبده ملکنه وارث اولق ایچون روسیه لولرجه ناقابل ترک و تغییر اولان مقصدک اثار فعلیه سندن عبارتدرکه بونک وسائل و اسباب مختلفه ایله تولید ایلدیکی وقایع تاریخ عثمانینک صحیفنی طولدیرمشدر .

الحاصل بیوک بترو دن صکره روسیه لولر پروت مغلوبیتندن قورتلق ایچون اظهار معاداته قیام ایتملرله برابر دولت علیه جه احتیاطه رعایه محاربه دن اجتناب اولنهرق روسیه دولتک پروت معاهده سنی نقض ایچون وقوعبولان تکلیفات مضره سنک قبولیه تجدید صلحه مجبوریت حاصل اولدینی متعاقب نوبت سلطنت سلطان محمود خان اوله کلدکده یینه اوستریا محاربه سنک ظهوری روسیه دولتجه اعلان حربیه وسیله اولمغله بیك یوز الی ایکی تاریخنده عقد اولنان مصالحه مقتضاسنجه دولت مشار الیها پروت مغلوبیتنک اثارندن کلیاً یاقه بی قورتاروب و ازاق قلعه سنی یکیدن ضبط ایدوب قبار طایر قطعه سنک دخی ایلروده استیلانسی تسهیل ایچون اداره جه استقلالنی دولت علیه تصدیق ایتدیرمش و آنک اوزرینه ازاق دکزنده قوه بحریه سنی تزید ایله قره دکزنده دخی دونما تدارکی املنه دوشمشدر .

چونکه روسیه لولر ممالک عثمانیه حقدنه اولان افکار استیلا کاریلرینی اقوام عیسویه بی عصیان و شقاوته تحریک و اغرا ایله یورتمکده سهولت کوردکلری کبی براقچ یوز سندن برو تخطی و تعدیلرندن بیزار اولدقلری تاتار قومنی و سائر شرق قبائلی زیر حمایه دولت علیه دن چیقاروبده عثمانلو قوه عسکریه سنی تقایل و روسیه دیارینه جاری تاتار مهاجمه سی

سیلابی سد و تعطیل ایچون قریمی و اکا مجاور و ملحق قبائل اسلامیہ الکلرینی ضبط ایتمک ایستدکلرندن ذکر اولنان اللی ایکی مصالحه سنی انتاج ایدن محاربه یه قدیم روم دولتی احیا شایعه سیله کیریشوب بالعموم روم ملتندن اولان تبعه دولت علیه یی او شمع امله پروانه ایتمش و اراسی چوق کچمدن قبارطای استقلاللی لقردیسنی اورته دن قالدیره رق تاتار قبائلی اوزرینه اولان نیت تعرضلرینی قبارطایلرک ضبطله ایلرولتمک قیام ایلمشدردر . وقتا که بیک یوز یتش بش سنه هجریه سنده ایکنجی قترینه روسیه ایمرطورچله لکنی تحصیل ایلدی پترونگ بقیه و صایای جهانکیرانه سنی اجرا ایچون اول باول لهستانک مقاسمه سنه قالدیشوب او مقصدینی استحصالدن صکره قریمه و ساثر بلاد عثمانیه یه تعرض نیتنده بولندیغنی ظاهر اولغله دولت علیه لهستانه تسلطک شروط سابقه عهدیه یه منافی اولدیغنی ادعاسیله بیک ایکی یوز سکسان ایکی تاریخنده روسیه یه اعلان حرب ایلمش ایدی لکن عساکر عثمانیه نک اسکی انتظام و اطاعتلری نظامسزلق و انقیادسز لغه مبدل اولدیغندن حرص استیلا ایله استکمال قوت و مکنت ایدن بردشمنه قارشو اک اول معلم عساکر ترتیب ایدوبده بعده حربه طورشمنق فریضه دن ایکن اولوقت شودقیقه یه رعایت اولنماسی دولت علیه جه مادی و معنوی ضایعات عنظیمه یی موجب اولدی شویله که روسیه عسکری قریمی و طونه نک اوته طرفنی بتون ضبط ایتمکله مغلوبانه عقد مصالحیه مجبوریت کورینه رک فوقشان و بکرشده جریان ایدن مکالمه لرده قترینه قریمک استقلال و سربستیسنی اساس صلح اتخاذ ایتمش اولدیغندن محاربه نک اعاده سنی ترجیح اولنوب نهایت بیک یوز سکسان سکنر تاریخنده روسیه لولر طونه نک برو طرفنه دخی کچهرک شمنیده سردار اکرم اردوسنی محاصره ایتمک لری نک اوزرینه قینارجه معاهده مضره سی عقد و امضا اولنمش ایدی که بونکله روسیه دولتی قریمک استقلاللی ماده سنی تصدیق ایتدیردکن و بر چوق توسیعات ملکیده دن فضله خریستیانلغک ممالک عثمانیه جه حمایتی خصوصنده و افلاق و بغداد امارتلی اوزرنده حقوق عظیمه یه نائل اولدی .

حاصلی قینارجه معاهده سی قترینه نک ممالک عثمانیه حقدنه کی منویات استیلا کاریسنه اساس مساعد اولوب اندن صکره قریمی کلیاً ممالکنه الحاق ایتمک ایچون دیده دوز دست اولدیغنی حالده چونکه اولجه لهستانی پرورسیا و اوستریا دولتلیله مقاسمه ایتمش بنابرین او طرفدن برکونه احترازی قالماش اولسندن و دول غریبه جه دخی مشاغل حربیه ظهور ایلمسندن استفاده ایدوب ممالک دولت علیه نک متفقاً بالهجوم مقاسمه سی

اوزرینه اوستریا ایمپراطوری ژوزف ایله اتفاق ایتیش و بوسره ده کندوسی قریم قطعه سندن
 ماعدا روم ایلی طرفه ال آتقی و اوستریا بوسنه یی و صربستانی آلمق و یونانستانده بر روم
 حکومتی او یاندر یلمق ایچون هجرتک بیک یوز طقسان بش سنه سنده بر معاهده خفیه عقد
 ایلمش ایدی ارادن ایکی سنه مرورنده یعنی بیک یوز طقسان یدی تاریخنده بعض بهانه
 احداث ایدرک قوبان و قریمی محاربه سزجه غضب و استیلا ایتمکه برابر ممالک عثمانیه نیک
 هر طرفنده افسادات و تحریکات اجراسنه دوام و قره دکز دونماسنیک تکثیرینه اهتام
 ایلمکده ایکن مؤخرآ فرانسه نیک دخی روسیه اتفاقه کچمسی انکلتره و پروسیا دولترینیک
 نظر دقتلرینی جلب ایتیش و ممالک عثمانیه مقاسمه مصممه سنیک روسیه و فرانسه و اوستریا
 دولترلی بیننده اجراسی احتمالی تلاش و اندیشه لرینی آرتیرمش اولمسیله دولت علیه یی
 روسیه علیه نه تحریک و اغرا ایدوب بیک ایکی یوز بر تاریخنده اعلان حربه مجبور ایتدیلر
 بو محاربه ده اوستریا دولتی بحسب الاتفاق روسیه یه مشارک و بلکه آندن زیاده حربه حریص
 و متهالک اولدیغندن مسئله کسب جسامت ایلدی واقعا دولت علیه دخی پروسیا و اسوچ
 دولترلیله اتفاق ایتیش و اسوچلولر بر مدت حربه کپریشمش ایسه ده پروسیالولر اوستریا ایله
 بالمعاهده دولت علیه یی متارکویه دعوت ایلدکلری کبی اسوچ دولتی دخی روسیه لولرله
 عقد مصالحه ایتمکه و انفاقلردن ثمرات نافع ائتقطف اولنه میوب وینه مغلوبانه صاحبه رضا
 اقتضا ایدوب بیک ایکی یوز التی تاریخنده منعقد اولان یاش مصالحه سی موجبجه دولت
 علیه قینارجه معاهده سنی و قوبان و طمان و قریمک استیلاسنه دائر سندک حکمنی ازرینو
 تأیید و طورله نه ری اوتنه سننده کی ایالاتی روسیه یه تسلیم ایلمشدر .

بومصالحه دن صکره قترینه نیک وقوع و فایله روسیه ایمپراطورلغنه کلان پاولو زماننده
 یعنی بیک ایکی یوز اون اوچ تاریخنده فرانسلر مصره مستولی اولنجه دولت علیه روسیه
 و انکلتره دولترلیله بر اتفاق تدافعی عقد ایدوب حتی روسیه نیک قره دکز دونماسی بوغاز
 ایچنه کلهرک دولت علیه دونماسیله اق دکزه چیقمش ایدی بناء علیه دولت علیه ایله روسیه
 بیننده اوزمان انارسلم و صفوت حاصل اولمش ایکن پالونک خلع و اعدامیله برنجی علكساندر
 تخت ایمپراطوری یه قاعد اولوب مؤخرآ مصرغانلله سی دخی بر طرف اولدقده روسیه لولر
 صرب و قره طاغ خلقنی عصیانه تحریک و کرجستانی ضمیمه ممالک ایتمک کبی شرائط اتفاقیه
 منافی حرکت باشلا دقتلرندن ینه ایکی طرفک مناسباتی درجه انقطاعه کلدیکنی متعاقب
 برنجی ناپولیونک فرانسه ایمپراطورلغنی اعلان ایله اوروپا موازنه دولیه سنی اخلال ایدن

محاربات عظیمه نك سرزده ساحة ظهور اولسی سببیله دولت علیه نك فرانسه ایله اتفاقدن منعیچون روسیه لولر انکلتزه دولتیله برابر دولت علیه ایله تجدید اتفاقه نهایت درجه ده چاشدیلهر حتی تبعه عثمانیه دن اولان خرستیانلرک فیابعد روسیه حمایه سنده بولملری کبی سند جدیده درج ایتدیرمک ایستدکلری بعض شرائط مکروهه بی دخی قاله المدیلر لکن اراسی چوق کچمدن روسیه دولتی مملکتین اداره سنده تحکمتی ارتیروب بریاندن دخی صرپستانک امارت مستقله شکلنه قونلسی داعیه نه قالقشمش وناپولیونک روسیه اوزرینه حرکتی سببیله دالمایچاده کی فرانسر اردوسنک ممالک عثمانیه دن مرور ولهستانه هجومی احتمالی وتوسیع بلاد آمالی ایله نقض عهد ایلش اولدیغندن دولت علیه بیک ایکی یوزیکرمی بر تاریخنده ینه اعلان حربه مجبور اولدی .

محاربه نك دوامی وروسیه اردولرینک حدود اوزرندن طرف طرف تهاجم واقتمحای ائناسنده ناپولیونک نائل اولدینی غلبه کامله روسیه دولتی فرانسرله صلحه مجبورایدوب ناپولیون دخی روسیه لولرک مماشاتی بولتیقه سنه موافق بولدیغندن وقعه سلیم خانی بی وسیله اتخاذا ایله روسیه اتفاقه میل ایدرک « تبلسیت » مصالحه سنده ممالک عثمانیه نك مقاسمه سنه روسیه ایمپراطوری علیکساندر ایله بیلنرنده قرار ویرمشلر ایسه ده صورت تقسیمده وباخصوص استانبولک ضبطنده اتفاق ایده مامشلا ایدی اما ناپولیون او ائنده بو اتفاقدن آریبوب دولت علیه بی روسیه ایله متارکبه اجبار ایلدی ومؤخرأ « ارفورت » ملاقاتنده روسیه ایمپراطوریه تأیید اتفاق حاوی یاپدینی معاهدده ممالک عثمانیه نك مقاسمه سی حقنده کی تصورات سابقه بی ترک ایله یالکنز افلاق وبغدانک روسیه دولتی طرفندن ضبطنه موافقت کوستروب بوضورتی اساس صالح اولاق اوزره دولت علیه یه تکلیف ایدنجه سلطان محمود خان ناینک جلوسندن صکره یعنی بیک ایکی یوزیکرمی درت تاریخنده محاربه عودت ایتش ودیکر طرفدن روسیه لولرک تحریک واعانه سیله صرپولرک عصیانی کسب شدت ایدوب روم ایلی قطعسه بالقاندره قدر روسیه اردولری وصفیه ده دکین صریبه عاصیلری استیلاسنه اوغرامش ایدی شو حال مغلوبیتک نتیجه سنده یعنی بیک ایکی یوزیکرمی بی تاریخنده عقد اولنان بکشر معاهده صلحیه سی صرپستانک امتیازات اداره سفی میدانه کتورمش وروسیه لولرجه مملکتینک استیلاسی املی حاصل اوله مدی ایسه ده اورایه تحکملری برقات دها تزیاید ایدرک اناطولی حدودنجه دخی توسیعات ملکیه اجرا ایتلرینه سبب اولش ایدی انک اوزرینه روسیه لولر موره خرستیانلرینک تحریک عروق شقاوتلرینه

ساعی اولوب قترینه زماندنبرومنوی ضمیر لری اولان یونان دولتی احیاداعیه سیله روم مذهبنده بولنان تبعه دولت علیه بی عصیانه تشویق ایتدکلرندن بیک ایکی یوز او توزالتی تاریخنده روم وقعه سی دینیلان حادثه سر بر آورده ظهور وممالک عثمانیه جه باعث انواع شروشور اولدی . روسیه دولتی بومسئله ده فرانسه وانکلتره ایله اتفاق ایدوب دولت علیه سکزسنه مدت اردولر سو قیله چالش دینی حالدده معاونت خارجیه سببیه دفع عصیانه مقتدر اوله میوب نهایت بیک سکز یوز یکر می التی سنه عیسویه سی نیساننده دول ثلثه متفقه نکل پترسبور غده تنظیم ایلدکلری مضبطه موجب نجه یونانستانک تعیین حدودیله اوراده اهل اسلام ساکن اولماقی اوزره دولت علیه تابع برامارت هیئته قونلسی تکلیف اولنمش ایکن دولت علیه بونی دخی رده اصرار ایتش ایدی دیگر طرفدن مصر والیسی محمد علی پاشا او توز بیک منتظم عسکرله عصاتی تنکیله چالیشوب مسئله غالبانه بتورملک اوزره ایکن فرانسرلر مصر عسکرینک چکل می ایچون محمد علی بی تضییق ایتدکلر نده انک دولت علیه دونمسی موجود اولدقجه بوکا قادر اوله میه جفتی بیان ایلمسی واو آراق لوند رده دول ثلثه طرفلر ندن امضا اولان دیگر مضبطه مدلولنجه یونانستانک بر حکومت مستقله ملیه اداره سنه ویرلمسیچون وقوع بولان تکلیفاتک دخی نزد دولت علیه ده قرین قبول اونامسی اوزرینه « ناوارین » لیماننده بولنان دونمای هایون فرانسه وانکلتره قوه بحریه سی طرفدن یاقیله رق ومصر عسکر ی چکیلوب موریه فرانسه دولتی جانندن عسکر کوندر یله رک مسئله بتون بتون بشقه شکله کیرمش ایدی متعاقباً روسیه دولتی بکرش معاهده سندنبرو مملکتین و صر پستان مصلحتلری و حدود تصحیحی کبی موضوع بحث اولان مسائلدن طولانی اظهار شقاقه مائل کورنمکله افکر مانده بر معاهده تنظیمیله دولت علیه مسائل مبحوئه جه بر طاقم مساعداتی اختیار ایلش ایکن یونان مسئله سی و روسیه تجار سفاینک قره دکزده سربستی سیر و حرکتلرینه مخالفتله توقیفلر ندن ناشی طلب ایلدیکی تضمیناتک اعطاسنده تردد اولنمسی وسیله اتخاذا ایدرک نقض عهد ایلش اولدیغندن بیک ایکی یوز قرق اوج سنه سی او اخر نده ینه محاربه یه کیریشلدی انجق روسیه اردولری بو محاربه ده غلیان متوالیه ایله ایلر ولیله رک بالقانلری تجاوزله ادر نه بی ضبط واستیلا ایتش واستانبولی دخی تهدیده باشلامش اولمسیله بیک ایکی یوز قرق بش تاریخنده ادر نده مغلوبانه بر معاهده عقد اولنه رق بونکله لوند رده مکالمه سنک قرار ی قبول ایله برابر یونان قرالغنک تشکلی واقکرمان معاهده سنک تاخر ایدن احکامی موجب نجه مملکتین و صر پستان امتیازاتک توسعانی وانا طولی حدودنده قلاع وبلاد عدیده نکل وچرکستانک روسیه یه ترکی وتضمینات حربیه اعطاسی کبی شروط مضره اختیار اولنمشدر .

لاحقه

بو اجمالاًن اكلاشيلوركه هجرنك بيك يوز تاريخدن بيك ايكي يوز قرق بش سنه سنه قدر بالدفعات روسيه ايله وقوعبولان محاربانده بالطه جي محمد پاشانك پروت مظفريتدن بشقه دولت عليه به نافع برحال ظهور ايتيوب غاڻيت هپ روسيه لولرده قالمش ويوز اللى سنه ايجنده نجه ممالك وسيعه الڊن چيقرب اولا صربستان وبعده موره عصيانلرينك ظهوره گللى اوزرينه صربستانك امارت ممتازه ويونانستانك وموره سسواحلنه متعلق جزايرك دولت مستقوله شكڤه قونلىس كبي ضايعات عظيمه دخى وقوعبولشدر .

شو حالك اسباب عسكريه وسياسيه سنى موازنه ايتك تاريخچه بك مهم اولديغدن بو محمله مختصراً ذكر وبيان شروع اولنور شوبله كه بونڊن اقدم اوروپا دولترلنده موظف وداثما حربه آماده عسكرو اوليوب لڊى الحاحه جلب وجمع اولنور ايكن دولت عليه موظف وقشله نشين اولمق اوزره يكيچرى ناميله بياده عسكرى وسپاه وسلحدار عنوانيله موظف سوارى ايجاد اولمش و بونلردن بشقه دولتك اك جسم قوه عسكريه سى تيمار وزعامت اربابى اولان سواريلردن مركب اوله رق تشكيل قلمش اولمسيه وقت سفرده اياثلردن اردولره يوز بيكلرجه عسكركلور وبوطاقدن ماعدا يالكيز روم ايلیده آقنجي ناميله قرق اللى بيك اينجه سوارى بونلور ايدى سلطان مراد ثالث عصرينه كلنجه به قدر يكيچريلر وسپاه وسلحدارلر خرسنيان چوققلرندن طوبالانوب عجمي قشله لرنده تربيه ايدلدكڊن صكره عسكره آلدقلى حالده اولا بو اصول اخلال ايديلوب مواجب دينيلان عسكرو معاشلرى دخى مقاطعه كبي شوكا بوكا توجه اولمغله حين حاجنده سوق اولنه جق موظف عسكرو بولنه مامغه باشلادى ارباب تيمار وزعامت دخى دور سليمان خانیده اراضى اميريه نك وقفينه جواز كوسترلمسڊن طولايي ينه سلطان مراد ثالث عصرنده باشلايان سوو استعمالات اترى اولمق اوزره تيمار وزعامتلك عسكرو اولميانلره توجهي سبيله معيشتسز قاهره برحال انقراضه گلش و آقنجيلر دخى رابطه اصليه سڊن چيقمش ايدى اوروپاده ايسه معلم عسكرو ظهوريله روسيه لولر كڤه بيوك پترو زماننده تنظيمات عسكريه اجرا ايتلمرى عثمانلورلك مفطور اولدقلى شجاعت و بسالتك آتارنى اولكى كبي ميدانه كتورمه ك مانع اولوب حتى بو حقيقت سلطان عثمان ثاينيك خوتين سفرنده تعين ايتمه كڤه وكلاى دولت بيننده تنظيم عسكرك و جوبى اعتراف اولمش وسلطان احمد ثالث عصرنده

یکچیریلرک سوء حاللری برمدت حربدن اتقا واحترازی ایجاب ایتدیرمش وسلطان محمود اول زمانزه دخی تنظیم عسکر هوسی تجدد ایتمش ایکن بیک یوز سکسان ایکی تاریخنده بو احتیاطه مخالف آجیلان محاربه دولت علییه یی بالاده ذکر ایتدیگمز قینارجه معاهده سی کچی بر بلایه اوغرا تمشدر .

آندن صکره سلطان سلیم خان ثالث نظام جدید نامیله ترتیب عسکره موفقیتنی دولت علیهنک تجدد مبانی شوکتی مأمولنه قوت ویردیکی حالده یکچیری غیر تکشلیکی بلاسیله ظهورایدن وقعه خلعهده نظام جدید عسکری طاغیلوب ینه اسکی باشی روزوقلق پریشانلغنه دوشولمش ایدی .

وقناکه نوبت سلطنت سلطان محمود خان ثانی په انتقال ایلدی جلوسنک اون سکزنجی سنه سننده یعنی بیک ایکی یوز قرق بر تاریخنده یکچیری اوجاغنی سوندیرمش ومصباح نظامات عسکریه یی یکیدن ایقاده ایله وجود دولت ومملکتی ظلام فلاکتدن قورتارمش ایدی . لکن عساکر منتظمه نک افرادی قلیل وتعامیم وتعلملرینک نقصان اولسی بیک ایکی یوز قرق اوج سنه سننده ظهورایدن محاربه ده دخی مغلوبیت وهزیمته سبب اولدی .

امورسیاسیه یه کلنجه دولت علیهنک دور فاتحانه سنده اروپاچه کندرو مصالخنه مداخه ایده جک بررقیبی بولنمدیغندن امورنده فاعل مختار وقوی الاقنذار اولسیله برابر او عصرلرده مناسبات دولیه پک محدود اولدیغیچون بولتیقه عالمند دخی اهمیت اولیوب سیف غالبیتله قطع مشکلات امور اولنور ایدی اما کیدرک اروپا دولنلری طریق مدنیتده طی مسافات وکسب ترقیات ایتدکلری حالده دولت علیهنک اسکی قوت ومکنتی کوندن کونه ضعفه دوشمشدر .

برده دولت علیهنک ظهورندنبرو سربستی ادیانه تعرض اولنمیوب او یولده مساعدات کامله بیدریغ طوبتلش ایکن تبعه غیر اسلامیه حقلمنده کی معامله عدلیه صکره لری تحقیر وتعدی په مبدل اولوب لکن روسیه لولر وسائر خرستیان اولان دولت ومملتلمالاک عثمانیه ده نفوذلری ایلرولدیجه خرستیانلری حمایه دعواسنه دوشدیلر ونهایت روسیه لولر قینارجه معاهده سنه خرستیانلنی جایه په دائر ماده مخصوصه درج وعلاوه ایتدیرمکه ممالک عثمانیه ده کی غیر مسلم جماعتلرینک حامیسی اولدقلرینی اعلان ومؤخرأ صربلولر ویونانلولری وادی عصیانه سوق ایتمکه صرف مساعی فراوان ایلدیلر ودولت علیهنه حربه بالدفعات غلبه ایدرک ادرنه معاهده سی حکمنجه یونان قرالغنی تشکیل ومملکتک وصرپ امارتلرینک

امتیازاتی توسیع ایندیرمکه برابر برچوق بلاد واقالم عثمانیه به مستولی اولدیلر بوقدر تعرض و تحکم اوزرینه دولت علیه نك کلیاً اعحسانه کیتمک روسیه لولرجه اخص آمال ایکن بوکا سائر بیوک دولت لک راضی اوله میه جقلرینی بیلدک لری جهته بالضروره او بوله کیده میوب دولت علیه یی قید منته باغلامق و ایستدک لری کبی قول الامق مسالک نی اختیار ایلدک لرن دن مصر والیسی محمد علی پاشانک عصیانیه مصر اردوسنک سوریه و حلب قطعه لرینی و آظنه و آیدین ایالت لرینی ضبط ایدرک کوناهیه به قدر کلمی دولت علیه یی بخاطر یه دوشورد کده سلطان محمودک استعانه سی قبول ایله استانبوله دونما و عسکر کوندر مشلر و خنکار اسکله سنده مصر علیه نه بر اتفاق تدافعی معاهده سی یاهر ق بحر سفید و سیاه بوغازلرینک روسیه ایله محارب اوله جق دولت اجنبیه دونماسنه مسدودیتنی و بالعکس کندو دونمالرینه ایستدیکی وقتده مفتوحیتنی دولت علیه به تعهد ایندیر مشلر ایدی لکن روسیه دولتک شو حرکتی دول ضربه نك داعیه رقابته قیاملرینی استلزام ایدوب فرانسزلر آچیق دن آجیغه محمد علی یی صحابت وانک دولت علیه به وارث اولق استحقاقنده بولندیقی اعلاناً مصره عسکر و دونما کوندر مکه قدر نیت ایلدک لری وانکلر لری ایسه بوغازلرک روسیه دونماسدن بشقه اجنبی سفاننه مسدودیتی ماده سن دن طولانی بر آرائق روسیه دولتک علی الفله استانبولی ضبط ایده بیللمسی احتمالنه قوت ویره رک منفعل اولدقلری حالده سلطان محمودک وقایله جلوس عبدالحمید خانی وقوعنده جزایر بحر سفیدده طولاشان دونمای هایون قبودان فراری احمد پاشا سوقیله مصر لویه التحاق ایدنجه شکل مسئله بالکلیه دکشمش و دولت علیه جه برداهیه مهلسکه پیدا اولمش ایدی .

ایکنجی فصل

جلوس عبدالمجید خانیدن پارس معاهده سنه قدر اون یدی سنه لک وقایعک اجمالی

عبدالمجید خان حضرتلری اون یدی یاشنده تخت عثمانی به جلوس ایدوب یوقاریده ذکر ایتدی کمز وجهله سفینه دولتی کرداب خطرده بولش ایدی . لکن بدرلری سلطان محمود خان مرحومک اواخر سلطنتده خارجیه نظارتنه ارتقا ایدن مصطفی رشید پاشانک سفارت فوق العاده ایله لوندریه عزیمتده استحصال ایلدیکی اساس اوزرینه انکلتزه دولتنک مصر مسئله سنجه دولت علیه به تکلیف ایتدیکی صورت آفاقیه به اوستریا و روسیا دولتلری داخل اولدقلری کچی روسیه دولتی دخی بالضروره خارجه طوره مدیفندن لوندریه ایشبورت دولته عقد اولسان معاهده موجبنجه یالکز مصر والیلکی علی طریق النوارث محمد علی عهد سنده ایقا اولنه رق مصر عسکرینک یدتغاب واستیلاسنه کچن ایالات دولت علیه به ترک و تسلیم ایلدی بوسره ده بوظا لرتک اصول قدیمه انسدادی اعاده ایله روسیه دولتنک خنکار اسکله سی معاهده سنجه قرارلشدیردینی صورت تعدیلیه الفا قلندیقندن معاهده مذکورنک حکمی قالدی .

رشید پاشا قدرت فطریه وقابلیت خلقیه ایله برملت ایچنده نادر ظهور ایدن اعظمندن اولغله دولت علیه یی ایکی به بولمک درجه سنه کلان مصر غا له سنی اورتدن قالدیره بیلمک ایچون اوروبابه قارشو تأمینات فعلیه کوستره رک دولتنک بقاسنه معین خارجی بولغله محبوریتی بالذات کشف و تحقیق ایلدیکندن اولاقئل و تسمیم ومصادره اموال کچی معاملات ظلمیه سببیه حکومت عثمانیه دن دلکیر اولان صنوف تبعه یی منع استبداد و وضع اساس عدل و داد ایله دولت متبوعه لرینه ایصندرمغه و حقوق عمومیه به رعایت قواعدینه دولت علیه به وجودینی اورتیه قویغنه مدار اولق اوزره امنیت مال و جان و محفوظیت عرض و ناموس اساسلرینی و قوانین و نظامات ایله مقید بقاعده اداره وضعی حاوی تنظیمات خیریه نامیله قرارلشدیردینی اصلاحاتی بیلک ایکی یوزاللئ بش سنه سی شهر شبنانک یکر می ایکنجی کونی کلخانده قرائت ایلدیکی خط هایون ایله اعلان ایتمش و مصر مسئله سنک حافی تنظیمات مذکورنک اجراسنه ربط ایدرک برمدتدنبرو دولت علیه نک احما واقاسنه مائل اولان اوروبا افکار عمومیه سنی تصحیح و تأمین ایله شوکت عثمانیه نک دوام و بقاسی لزومنی تصدیق ایتدیرمشدر .

رشید پاشا بوهمت عالی‌سنی فعله کتورمک ایچون خارجا مدافعه معادانه جالشدینی کبی داخله دخی بیلارجه یرلشمش افکار مستبدانه و حقوق شکنانه اربانک صدمه اعتراض و اختلاف‌فرینه کوکس ویره رک غیرت فداکارانه ایله محافظه اساس تنظیماته و اداره اجرای اصلاحاته دوام واهتمام ایلدی ایالتلر وایلرک النده مالکانه کبی مضبوط ایکن اصول اداره منتظمه بی تأسیس وقاعده مشروعه مشورتی تعیین ایله حکومت ملکیه بی تشکیل ایدرک بوسایه ده واردات دولتی برقاچ قاتنه ابلاغ و فنون و معارفک انتشارینه واسطه اوله جق مکتاتب عمومیه بی کشاد ایتدی واعمار ملکیک طرق وسائلی اظهار ایله مقدمات فعلیه سنه نشبث ایلدی حاصلی دولت علیه بی بر دولت منتظمه صره سنه قویوب عثمانیلرک اوروپا جمعیت مدنیسه ایچنده موقع نمازه لایق اولدقلرینی برقاچ سنه اول بونک عکسنی مطالعه ایدن دولتره تصدیق واعتراف ایتدیردی لکن دولت علیه نک انکلتربه تقریبی روسیه دولتی کندوسندن تباعده حمل ایله منفعل ایکن مجار ولهستان اختلاللری ظهوریله پنجه قهرندن فرار و ممالک عثمانیه ده قرار ایدن ملتجیلرک ردی دعواسنه قیام و پروت اوزرینه سوق عسکرله محاربه نمایشلرینی اعلام ایلدی اما بومسئله ده دخی دولت علیه فرانسه وانکلتزنه نک افکار متفقانه سندن استفاده ایله روسیه دولتک مدعاسنه قارشو ملتجیلری قبول وحمایه ده اصرار ایدرک مسئله بی منتج حرب اولقسزین حل ایتیش و بوطریق ایله قتلک مذهبنده اولان میلیونرجه اوروپاها ایستک محبت صمیمه لرینی جلب ایلسی روسیه نک نفوذینی کرکی کبی سکتله لیدر مش ایدی .

روسیه دولتی بو حالدن پک زیاده متأثر اولوب ممالک عثمانیه ده ضایع ایلدیکی نفوذ و تحکمی تکرار قزانمق ایچون فرصت بین ایکن فرانسزلرک قدسده کی قمامه کلیسایسنجه استحصال ایتدکلری حق جدیدی بر مسئله حکمنه قویه رق اکاکوره کندوسی دخی برشی المق املیه وقینارجه معاهده سندنبرو النده بولنان سر رشته عهدیه استناداً روم کلیسایسنی محابث رنگیله روم مذهبنده بولنان تبعه دولت علیه بی حمایه داعیه سنه قالشدی و بو مدطانی برنس « منچیقوف » سفارتیله باب عالی به بر صورت شدیدیه ده تبلیغ ایتدیکنی متعاقب افلاق و بغدادنه عسکر سوقیله تقض عهد ایلدی .

دولت علیه ایسه بویه بر تکلیفک کندو استقلالنجه مخاطراتی نظر دفته الهرق نهایت درجه ده مخالفتی ورد مدعاده ثباتی التزام ایدوب بیک ایکی یوز ایتیش طقوز سنه سی اواخرنده اعلان حربه مجبور اولدینی کبی روسیه دولتک موجب حرب اولان دعواسنده کی ناحقانی

وافکارنده کورینان استیلاکارانی دیگر دولت ر دخی اکلا دقلرندن واکرچه اوستریا دولتی
توسطیله بعض تشبثات مصاحانه وقوع بولدی ایسه ده دولت علیه بی تأمین ایده جک
نتیجه یه واصل اوله مدیغندن انکلتزه و فرانسه دولتری اعلان حربدن اولجه بحر سفید
بوغازینه دونما ارسالیله روسیه بی تهدید ایتدیلر وقتا که باب مخاصمه اچیلوب آتش حرب
وقال اشتعال ایلدی نسیم غالبیت بدایه عثمانلی اردولرنده وزان اولمش ایکن قره دکزه
چیقاریلان دونمانک سینوب لیاننده روسیه سفن حربیه سی طرفندن احراق ایدلمسی
استانبولک محفوظیتی مقصدینی اخلال ایلدیکنندن اولا انکلتزه و فرانسه دولتری و متعاقباً
ساردنیا دولتی دولت علیه ایله معاهده اتفاقیه عقد ایدرک روسیه اوزرینه سفر آچدیلر
وقریمه عسکر و دونما سوق و تسیریه روسیه نک قره دکز دونماسی سیواستپول لیاننده
کاملاً احراق ایلدیلر .

دول معاونه حربیه کیرشمزدن مقدم روسیه عسکرینک سلستره محاصره سندن مغلوباً
رجعتلری طونه جهتنده کی دولت علیه اردوسنک غالبیتی آرتیروب روم ایلی قطعه سنده
روسیه لولرک تجاوزاتنه میدان ویرلماش اولدیغنی متعاقب قریم محاربه سنک ظهوری
سببیه روسیه اردوسی طونه دن بتون بتون چکلشم و دولت علیه جه یالکنز اناطولیده
قارص قلعه سنک روسیه یدینه کچمسندن بشقه ضایعات وقوع بولیوب اکا مقابل باطوم
جهتنده کی عثمانلی اردوسی دخی روسیه دن بعض ممالک ضبط ایلش ایدی .

سیواستپول مظفرتی اوزرینه انکلتزه دولتی بحر بالطق طرفندن هجوم ایچون تدارکات
عظیمه ایله مشغول ایکن روسیه ایمراطوری نيقولانک و فاتیه ایکنجی الکساندر قاعد
سریر حکومت اولنجه فرانسه ایمراطوری اوچنجی ناپولیون ایله اوپوشه رق مصالحه تمیناتنده
بولنقله ناپولیون ایشک ایلروسنه کیتمکدن فارغ اولوب بیک ایکیوز یتمش ایکی سنه هجریه سنه
مصادف اولان بیک سکن یوز الی الی سنه عیسویه سنه ده دولت علیه و روسیه و انکلتزه و فرانسه
واوستریا و پروسیا و ساردنیا دولتری مرخصلرندن مرکب پارسده مجلس مکالمه عقدیه
بر معاهده صلحیه یاییلمش ایدیکه انک احکامنجه دولت علیه نک استقلال و تمامیت ملکیه سی
دول معاهده نک تحت کفالتلرنده بولنق و قره دکز بی طرف قلوب روسیه نک اوراده دونماسی
بولنماق و بسارایان بر قطعه اراضی بغدادنه الحاق و طونه بوغازلری تماماً دولت علیه یه
ترک اولنق و دولت علیه نک تبعه سیله اولان معاملاتنه دولتر جانبندن منفرداً و مشترکاً
مداخله اولنماق کبی شرائط نافعه استحصال اولندی و دول معاونه تمامیت ملکیه دولت

علیه طوقه جق حالانده محافظه اتفاقه قرار ویرمکه برابر اوستریا دولتی دخی دائره
 اتف اقلرینه الدقلرندن روسیه لولرک ممالک عثمانیه حقنده کی آمال استیلالرینه قوتلی برسد
 چکلمش اولدی اما روسیه دولتنک اورته یه قوبدینی دعوا خرسیتیانلغله ممالک عثمانیه ده
 وقایه امتیازی قضیه سی اولوب حمایت مذهبه نامیله حقوق دولت علیه اشتراکه قالقشمش
 اولسنه دول معاونه طرفلرندن مال و جان ایله قارشو طورلمش ایسه ده خرسیتیانلغه دائر
 هیچ برشی دیمه رک معاهده یاپسه لر دولت علیه اعانه ایچون ایچه وعسکر ویرمش اولان
 ملتلرینک طعن و تعریضی التده قاله جقلرینی ملاحظه ایله برابر مصالحه ده ینه منحصرأ
 خرسیتیانلقدن بحث ایتسه لر روسیه دولتنک دعواسنه حق ویرمش و کندولرینک حربه
 کیرشمیری معناسز کبی کورولمش اوله جغنی دخی بیلدکلرندن مقصد اصلیلری هیچ بر
 صنف و مذهبه عاند اولیه رق ممالک عثمانیه اهالیسنک استحصال حسن حالی و بو طریق ایله
 دولت علیه نک تأیید اساس حکومت و استقلاللی اولدیفنی کوسترمک ایچون خرسیتیانلرجه
 یالکز مذهبه عاند اولوب من القندیم ویرمش اولان امتیازاتک تا کیدیه هر صنف تبعه
 عثمانیه نک حقوق و معاملاتجه مساوات کامله یه مظهر اولدقلرینی اعلان ایله برابر فوائد
 و منافعی جمله یه واصل و شامل اوله جق بعض اصلاحاتک دخی بوسره ده نشر اولمسنی و
 بو اعلان معاهده نک انعقادندن اول یاپیله رق منحصرأ طرف دولت علیه دن ظهوره کلش
 بر قنوت و مرؤت شکل و حالنه قونلمسنی بیان و اخطار ایتمشلر ایدی .

شرائط صالحیه صره سننده وقوعبولان شوتکلیف اول وقت باب عالیجه موقع بحثه
 قونیلوب واقعا بوسورت روسیه نک موجب حرب اولان ادعاسنی شکل دیکرده قبول و
 ترویج ایلک دیمک اولور ایسه ده دولت علیه نک استقلالنی محافظه یولنده قان دوکن
 دولتلرک بویله برطبلرینی قبول ایتمانک امکانی اولدیفنی اکلاشیلهرق مجلس مکالمه نک
 انعقادندن اول اصلاحات فرمانی نامیله برامر عالی اصدار وپارس معاهده سنک طقوزنجی
 ماده سننده طرف دولت علیه دن اولیه برفرمانک صدور ایتمش اولدیفنی یاد و تذکار اولنمش
 ایدی بو فرمانک احکامی بالعموم اهالی ممالک عثمانیه یه شامل ایسه ده دولت علیه نک تبعه سیله
 اولان معاملاتنه دولتلرک مداخله ایتیه چکلرینه دائر معاهده یه درج اولنان ماده نک حکمی
 اصلاحات فرمانک نص عهدده ذکر و ایراد و بین الدول سند اتخاذه اولنمسیله لفظ بی معنا
 درجه سنه ایتمش اولدیفندن استقبالا مصالح داخلیه و تبعه غیر اسلامیه نک نظارت و حمایت
 مشترکه دوله تحتنه کیره جکی و فرانسه و انکلتراه نک محافظه استقلال سلطنت عثمانیه حقنده

اولان مدعاليڻي وانك اوزرينه وقوعبولان فداكارلقلڻي شوق فعل تقض واخلال
 ايلديكندن نتيجه مقدمه يه موافق ظهورايمه جيڪي بختنده نيجه ادله وبراين مهمه يي حاوي
 صدر سابق مصطفي رشيد پاشا سلطان عبدالمجيد به برلايمه تقديم ايتمش ايدي .
 هر نه ايسه پارس معاهده سي دولت عليه نك حال وموقعنجه غالبانه وروسيه جه مقلوبانه
 برمصاله نك سندن اولسيه بوني بوزمق و آمال ومقاصديني استحصال ايتمك ايجون
 روسيه دولتتک هر تدبيره مراجعتله کندوسنه مساعد اوله بيله جک بر زمان فرصتدن
 استفاده ايله جيڪي بيلنيور ايدي .



اوچنجی فصل

پارس معاہدہ سنک انعقادندن جلوس عبدالعزیز خانیہ

قدر جریان ایدن وقایعک اجمالی

بالادہ ذکر اولندینی وجہلہ پارس معاہدہ صلحیہ سی دولت علیہنک استقلال و تمامیت ملکیہ سنی تحت تأمینہ آتش و محاربه نك مالا انتاج ایلدیکی مضایقه انکلترہ و فرانسه دولتری کفالتلریله عقد اولنان استقراض خارجی ایلہ تعدیل اولمش ایکن مصالحہنک انعقادیلہ دول معاوانہ اردولری چکلادکدن صکرہ جسم دولته علت سفاهت مستولی اولوب بونک دوامی محاربه دن بیوک بلالره سبیت ویردی .

تفصیل احوال شو و جہاہ خلاصہ اولنورکہ جلوس عبدالجید خانیدن صکرہ ملت عثمانیہنک حقوقجہ و جان و مالجہ امنیتہ خدمت ایلان و اوروپا اصول مدینتی ممالک عثمانیہدہ اک اول موقع تطبیقہ وضع ایلہ افکار عمومیہ بی اوپاندیران مصطفی رشید پاشا ایسہدہ کندوسی طبعاً عالی جناب و ارباب حاجاتہ مکارم و عنایاتی بی حساب اولدیغندن افراط کرملہ ابتدیکی بورجلری پادشاهہ و خزینہ دولته ویردیرمک کبی آجدینی بولدن سائرلری دخی کچمک ایستمکله خزینہ دولتک موازنہ دخل و خرجه خلل کلدی مثلاً بالطہ لیمانندہ یابدینی ساحلخانہ بی مخدومی علی غالب پاشایہ تزویج اولنان فاطمہ سلطمان ایچون میری بہ صاتوب مقابلندہ ایکی یوز اللی بیگ لیرا آلدی بوکیدیشلر ایسہ ہب قریم محاربه سندن صکرہ باشلادی عبدالجید خانک اوائل سلطنتندہ متصرفانہ حرکت اولنور ایکن ایکی دفعہ اجرا اولنان زفاف و ختان سورلرنده کی مصرفلر و حرم ہایوندن خزینہ دولته تحمیل ایدیلان بورجلر و حساب عقلہ صیغمز سفاهتلرہ و وکلاہ و یریلان عطیہلر بنیان دولتی تملندن اویناتدی بش آتی سنہدہ سکسان ملیون لیرادن زیادہ اوروپایہ بورج ابدلدی یکرمی ملیون لیرالق اوراق نقدیہ معاملات عامہ بی افساد ایدوب اعتباردن ساقط اولدی و دواتر دولت بورج ایچنہ باطدی منافع ملک و ملتہ و تزئید قوت دولته بر اچنہ صرف اولنوب مستقرضات ہب ہواہ کیتدی او انندہ ایسہ رشید پاشا وفات ایتمکله دولتک ادارہ سیاسیہ سندن انک اکسکلکی کورلرکہ باشلادی دیگر طرفدن ایشلرک بوزوقلنی خلقہ کران کلوب حتی سلطان عبدالجیدی اعدام غرضیلہ یتش التی تاریخندہ بر جمعیت خفیہ تکمل ابتدیکی خبر آله نرق مرتبلی طوتلدی پارس معاہدہ سیلہ قوجہ بر محاربه دن